



Uunga siunnersuut: Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaata allangortinneqarnissaa pillugu Inatsisartut Inatsisaat.

(Aningaasaqarnermut Nunamullu Namminermut Naalakkersuisoq).

(Siullermeerneqarnera)

Demokraatit aallaavittut missingersuutitut naatsorsuutitullu inatsimmut allannguutissatut siunnersuut isumaqatigaat. Pingaartutut isigaarput, inatsisit assigiingitsut ullutsinnut naapertuunnersut nalilersortuarneqarnissaat, pingaartuuvorlu allannguuteqartoqarnissaanik tunngavissaqarpat iliuseqarnissaq.

Missingersuusiornermut inatsit imaannaangitsuuvoq, taamaattumillu pingaaruteqarpoq, Aningaasaqarnermut- Akileraartarnermullu ataatsimiititaliap piffissaqarluarluni ataatsimiititaliami siunnersuut suliarippagu, taamaasilluta qulakkiissagatsigu, allannguutit siunertaq malillugu atuutilersinneqarnissaat.

Taamaattorli marlussunnik apeqqutissaqarpunga:

1. Siunnersuummut oqaaseqaatini nalignnaasuni Naalakkersuisut uparuarpaat, akileraarutit qaffakkaluttuinnarnissaat kissaatiginagu. Tamanna soorunami isumaqatigaara, taamaattorli uparuangitsoorsinnaangilara, oqaasertaliussami akileraarutit qaffannissaat toqqaannartumik akerlilerneqarsimangimmata. Taamaattumik Naalakkersuisut apererusuppakka akileraarutit qaffannissaannik pilersaaruteqarnersut.
2. Siunnersuummut oqaaseqaatini nalignnaasuni Naalakkersuisut uparuarpaat, Kalaallit Nunaanni pisortat ingerlataasa annertunerujussuat nunanut avannarlernut allanut sanilliullugu, peqqutaasut ilagigaat, pisortat ingerlataasa pisariillisarsimanerisa naammaginarsimangimmata. Tamanna tunngavigalugu Naalakkersuisut qinnuigaakka nassuiaqqullugu pisortat ingerlataanik pisariillisaanissamik suliaq qanoq aallartisarneqarniersoq.

Apeqquteqaatima pitsaasumik ersarissumillu akissuteqarfigineqarnissaat neriuutigalugu matumuuna siunnersuutip Aningaasaqarnermut- Akileraartarnermullu ataatsimiititaliami suliareqqinnissaa innersuussutigaa.